

摘藻堂四庫全書薈要

集部

欽定四庫全書薈要

集部

宋詩鈔卷九十四

五

詳校官候選知縣臣吳甸華



欽定四庫全書薈要卷二萬三百四十七

集部

宋詩鈔卷九十四

內閣中書舍人吳之振編

戴敏東臯詩鈔

敏字敏才號東臯子復古之父乾道間人平生不肯作舉子業獨以詩自適終窮而不悔且死復古方襁褓語親友曰吾病革矣而子幼詩遂無傳乎太息而卒語不及他其篤好如此遺稿不存復古後搜訪

得此十篇鍛鍊精而情致逸此石屏詩源猶少陵之
審言也

小園

小園無事日徘徊頻報家人送酒來惜樹不磨脩月斧
愛花須築避風臺引些渠水添池滿移箇柴門傍竹開
多謝有情雙白鷺暫時飛去又飛回

屏上晚眺

不能騎馬趨朝班自跨黃牛扣竹關無德可稱徒富貴

有錢難買是清閒
人行躑躅紅邊路
日落秭歸啼處山
遙望蓬萊在何許
扶桑東畔白雲間

約黃董二親與桂堂諸姪避暑

世間無處避炎蒸
欲叫西風叫不應
恨乏白檀除熱惱
心思赤脚踏層冰
醉游河朔誰同往
表借明光愧不能
聞有山林最深處
清涼境界着高僧

樓上

終朝役役晚來閒
識破浮生一夢間
挈榼去沽深巷酒

倚樓貪看夕陽山月臨江館人橫笛風摺蘆花雁度關
堪羨漁翁無檢束扁舟占斷白雲灣

西溪陳居士家

來訪西巖老家居水竹村紫鱗遊鏡曲黃犢臥雲根自
昔好賓客相傳到子孫不行亭下路護筍別開門

後浦園廬

卜築成佳致幽棲樂聖時何如謝公墅略似習家池地
煖梅開早天寒酒熟遲催租人去後續得夜來詩

鄭公家

門墻多古意耕釣作生涯菽米散魚子蓮根拔虎牙弄
孫時擲果留客旋煎茶頗動詩人興滿園蕎麥花

海上

萬頃鯨波朝日赤滄洲四望無窮極海山何處是蓬萊
遍問漁翁都不識

觀梅

三杯暖寒酒一榻竹亭前為愛梅花月終宵不肯眠

趙十朋夫人挽章

縫掖先生遊汗漫夫人高節獨青青
臨行抖擻空書笥
分付諸郎各一經

此詩有五絕吟藁零落十朋先生黃巖前輩行誼甚
高嘗有詩云數枚豚犬粗知書二頃良田樂有餘杜
酒三盃碁一局客來渾不問親疎梅溪先生尊敬之
有杜酒三盃碁一局王十朋如趙十朋之句

宋詩鈔卷九十四

欽定四庫全書薈要卷二萬三百四十八 集部

宋詩鈔卷九十五

內閣中書舍人吳之振編

戴復古石屏詩鈔上

復古字式之天台黃巖人居南塘石屏山因自號
焉負竒尚氣慷慨不羈少孤痛父東臯子遺言收拾
殘稿遂篤志於詩從雪巢林景思竹隱徐淵子講明
句法復登放翁之門而詩益進南游甌閩北窺吳越

逾梅嶺窮桂林上會稽絕重江浮彭蠡汎洞庭望匡廬五老九疑諸峰然後放於淮泗歸老委羽之下遊歷既廣聞見益多為學益高深而奧密以詩鳴江湖間五十年或語復古宋詩不及唐曰不然本朝詩出於經此人所未識而復古獨心知之故其詩正大醇雅多與理契機括妙用殆非言傳然猶自謂胸中無千百字書如商賈乏貲本不能致奇貨蓋謙言也吳荆溪稱其蒐獵點勘自周漢至今大編秘文遺事度

說何啻百千家包盱江亦謂正不滯於書乃楊升庵
直議其無百字成誦此癡人說夢耳又傳其游江西
富家以女妻之三年思歸乃言曾娶婦翁怒女曲解
之臨行贈詞曰惜多才憐薄命無計可留汝揉碎花
牋忍寫斷腸句道傷楊柳依依千絲萬縷抵不住一
分愁緒捉月盟風不是夢中語後回君若重來不相
忘處把杯酒澆奴墳上土遂自投江死今考集中畧
無踪跡後人因詩餘木蘭花慢一闋有重來故人不

見但依然楊柳小樓東之句乃強實之讀陳昉跋云
有忠益而無謫求有謙和而無誕傲姚鏞云忠義根
於天資學問培於諸老朱子亦以詩相贈酬使無行
至此其得為大儒君子所稱許至升庵乃發覆耶平
生著作甚富趙懶庵選百三十首為小集觀者謂趙
於古少許可而此編特博袁蒙齋又選為續集蕭學
易選為第三稿李友山姚希聲選為第四稿鞏仲至
又為摘句復古自云詩不可計遲速每一得句或經

年而成篇其鍛鍊之苦師友琢削之精故所選得十
九焉方萬里曰慶元以來詩人為謁客成風干求要
路動獲千萬石屏鄙之不為也嗟乎安得斯人一愧
世之幅巾朱門望塵獻詩者哉

求先人墨蹟呈表兄黃季文

我翁本詩仙遊戲滄海上引手掣鯨鯢失脚墮塵網身
窮道則腴年高氣彌壯平生無長物飲盡千斛釀傳家
古錦囊自作金玉想篇章久零落人間眇餘響搜求二

十年痛淚濕黃壤君家圖書府墨色照青嶂我翁有遺
迹數紙古田樣髣髴鍾王體吟句更豪放把玩竹林間
風寒凜悽愴昂昂野鶴姿愧無中散狀兒孤襁褓中家
隨風埽蕩於茲見筆法可想翁無恙幽居寂寞鄉風月
共來往衆醜成獨妍羣瘖怪孤唱一生既蹉跎人琴遂
俱喪託君名不朽斯文豈天相舊作忽新傳識者動慨
賞嗟予忝厥嗣朝夕愧俯仰敢墜顯揚思幽光發草莽
假此見諸公丐銘松柏壙君其啓惠心慰彼九泉望

夢中亦役役

半夜羣動息五更百夢殘
天雞啼一聲萬枕不遑安
一日一百刻能得幾刻閒
當其閒睡時作夢更多端
窮者夢富貴達者夢神仙
夢中亦役役人生良鮮歡

飲馬長城窟

朔風凜高秋黑霧翳白日
漢兵來伐胡飲馬長城窟
古來長城窟中有戰士骨
骨久化為泉馬來喫不得
聞說華山陽水甘春草長

白苧歌

懶庵選石屏詩南塘稱其精到其間白苧歌最古雅語簡意深今世難得所謂一不

為少

雪為緯玉為經一織三滌手織成一片水清如夷齊

一作

夷齊可以為衣陟彼西山予以采薇

題陳毅甫家壁

了翁之後也

朱門金叵羅九醞葡萄春酌貴不酌賤酌富不酌貧君
家破茆屋飄搖河水濱中有一樽淥醉盡天下人

答婦詞

舊嘗和彥先婦答夫
二首故復賦此篇

江山阻且長，矯首鄉關隔。空閨泣幼婦，顛顛失顏色。隱
閨鸛鳴篇，寄彼西飛翼。剝封覽情素，既喜復淒惻。別時

梅始花，傷今食梅實。覽古帝王州，結交游俠窟。千金沽
美酒，一飲連十日。春風吹酒醒，始知身是客。杜宇啼一
聲，行人淚橫臆。衣破誰與紉，髮垢孰與櫛。勿謂遊子心
而不念家室，新交握臂行，肝膽猶楚越。醜婦隔江山，千
里情弗絕。慙慙揮報章，歸計何時決。今夕知何夕，睹此

纖纖月，此月再圓時。門前候歸車，一作轍

都中書懷呈滕仁伯秘監

北風朝暮寒園林日蕭條自非松柏姿何葉不飄搖
儒衣歷多難陋巷困簞瓢無地可躬耕無才仕王朝一饑
驅我來騎驢吟灞橋通名丞相府數月不見招欲登五
侯門非皓齒細腰索米長安街滿口讀詩騷時人試靜
聽霜枝轉寒蛸倘可悅人耳安望如蕭韶

所館小樓見山可喜

茲樓非我有久居如主人雖無往來客青山當佳賓君

看樓下路三尺軟紅塵
失脚踏此塵汨沒多終身

大熱五首

天地一大窑
陽炭烹六月萬物此陶鎔
人何怨炎熱君看百穀秋
亦自暑中結田水沸如湯
背汗濕如潑農夫方夏耘
安坐吾敢食

左手遮赤日右手招清風
揮汗不能已扇笠競要功
南山龍吐雲騰騰滿虛空
一雨變清涼萬物隨疏通
向人無德色大哉造化工

大渴遇甘井汲多井欲竭入喉化為汗不救胃中熱吾
聞三危露迥與衆水別其色瑩琉璃其冷勝冰雪安得
一杯來為我解此渴

吾家老茆屋破漏尚可住門前五巨樟枝葉龍蛇舞半
空隔天日六月不知暑西照坐東偏南薰開北戶胡為
捨是居受此炮炙苦

天嗔吾面白晒作鐵色深天能黑我面豈能黑我心我
心有冰雪不受暑氣侵推去北窓枕思鼓南風琴千古

叫虞舜遺我以一作好音

久寓泉南待一故人消息桂隱諸葛如晦謂客舍
不可住借一園亭安下即事凡有十首

寄跡小園中自笑客異鄉東家送檳榔西家送檳榔咀
嚼脣齒赤亦能醉我腸南人敬愛客以此當茶湯慇懃
謝其來此意不可忘

寄跡小園中豈不勝旅舍俗事無交加客身自閒暇鄰
家有酒沽杯盤亦可借吟侶適相過新詩堪膾炙足以

慰我懷留連日至夜

寄跡小園中數椽亦瀟灑主人既相知此地可久假縣
官送月糧鄰翁供菜把咫尺是屠門亦有賣鮮者里巷
通來往欲結雞豚社

寄跡小園中餘春接初夏問木木成陰問花花已謝黃
鸝出幽谷杜鵑叫長夜把酒酌園婆遠客此稅駕有時
吟聲高鬼神莫驚怕

寄跡小園中一心安淡薄每坐竹間亭不知近城郭昨

日看花開今日見花落靜中觀物化妙處在一覺委身
以順命無憂亦無樂

寄跡小園中第一薪水便逐一炊黃梁兼得魚鰕賤飽
飯日無營遮眼有書卷時逢好客來應接不知倦最苦

風雨時有人招夜宴

逐一疑
作逐日

寄跡小園中新晴風日麗好鳥竹間鳴野鶴空中唳悠
然動詩興行吟撫松桂久客若忘歸此身笑匏繫五月
倘未行尚及食丹荔

寄跡小園中頗欲悶形影誰為饒舌者太守忽相請開
心論時務細語及時境坐中有蠻客狂言事馳騁明日
酒醒來熟思令人瘦

悶一作關

寄跡小園中忽有烏衣至手中執圓封州府特遣餽羅
列滿吾前禮數頗周緻四鄰來聚觀若有流涎意呼童
急開樽四鄰同一醉

寄跡小園中倒指五十日既得故人書南游吾事畢再
拜謝主翁奉還此一室雲萍聚復散欲住住不得折柳

當馬鞭明朝有行色

題鄭寧夫玉軒詩卷

良玉假雕琢好詩費吟哦詩句果如玉沈謝不足多玉
聲貴清越玉色愛純粹作詩亦如之要在工夫至辨玉
先辨石論詩先論格詩家體固多文章有正脈細觀玉
軒吟一生良苦心雕琢復雕琢片玉萬黃金

和高常簿暮春

世變日以薄無從見雍熙閉門讀古書聊以道自怡桃

李春盎盎風雨秋淒淒於春何足喜於秋何用悲人生
一世間所忌立志早終身有不遇千載皆明時我生無
所解肥遯滄海沂一朝遇名勝朽腐生光輝斂衽贊明
德非公誰與歸

和鄭潤甫提舉見寄

出門欲求仁取友必勝己寥寥海雲鄉所幸有君爾曾
蟠三萬卷智先三十里相與定詩盟誰能執牛耳

長身如病鶴吟苦如蟋蟀顧此顛顛姿癡生年八秩舉

世皆好竽老夫方鼓瑟梅花莫笑人茅簷炙朝日

送吳伯成歸建昌二首

此是包宏齋侔
台時作癸卯夏

老夫脚病瘡閉門作僧夏麥麩不療饑冬衣猶未卸喜
讀吳融詩窮愁退三舍無因暗投壁有味倒飡蔗冥搜
琢肺肝苦吟忘晝夜工夫到深處非王亦非霸

吾友嚴華谷實為君里人多年入詩社錦囊貯清新昨
者袁蒙齋招為入幕賓千里有遇合隔牆不見親君歸
訪其家說我老病身別有千萬意付之六六鱗

謝東倅包宏父三首

癸卯夏

詩文雖兩途理義歸乎一風騷凡幾變晚唐諸子出本
朝師古學六經為世用諸公相羽翼文章還正統晦翁
講道餘高吟復超絕異言許其詩鳳凰飛處別

君家名父子為晦翁嫡傳嘗見黃勉齋極口稱其賢師
友相琢磨南軒惜無年翁之為汝翁文字相周旋溟渤
深見底泰華高及天宏齋有鳳髓可續欲斷弦

平生不識字把筆學吟詩舊說韋蘇州於余今見之每

遭饑寒厄出吐辛酸辭候蟲鳴屋壁風蟬轉枯枝但有
可憐聲入耳終無竒宏齋誤題品恐貽識者譏

題姚雪蓬使君所藏蘇野塘畫

高者為山坳者為壑為煙為雲渺渺漠漠水鳥樹林人
家聚落騎者何之舟者未泊三尺紙上萬象交錯天機
自然神驚鬼愕嗚呼此吾故人野塘蘇元龍之墨蹟中
有石屏老淚痕又與野塘添一筆

烏鹽角行

鳳簫鼉鼓龍鬚笛夜宴華堂醉春色艷歌妙舞蕩心心
但有歡娛別無益何如村落捲筒吹能使時人知稼穡
村南村北聲相續青郊雨後耕黃犢一聲催得大麥黃
一聲換得新秧綠人言此角只兒戲孰識古人吹角意
田家作勞多怨咨故假聲音召和氣吹此角起東作吹
此角田家樂此角上與鄒子之律同宮商合鍾呂形甚
朴聲甚古一吹寒谷生禾黍

靈璧石歌為方巖王郎中作

靈壁一峯天下奇體勢雄偉身巍巍巨靈怒拗天柱擲
平地蒼龍驤首尾兩片黑雲腰夾之聲如青銅色碧玉
秀潤四時嵐翠濕乾坤所寶落世間鬼神上訴天公泣
謂有非常人致此非常物可磨斫賊劍可倚擊姦笏可
祝不老年可比至剛德自從突兀在眼前溪山夜夜生
顏色君不見杭州風流白使君雅愛天竺雙雲根又不
見奇章公家太湖碧高下品題分甲乙二公名與石不
磨今到方巖有靈壁我來欲作靈壁歌擊石一唱三摩

掌秋風蕭蕭淮水波中分南北橫干戈邊塵埋沒漢山
河泗濱靈壁今如何安得此石來岩阿鬱然盤礴中原
氣對此令人感慨多

章泉二老歌

在昔商山傳四皓又聞香山圖九老異鄉異姓適同時
爭如章泉一家兄弟登期頤章泉之上兩山下有地可
宮田可稼伯也早休官季也相約歸林泉名動京口耕
谷口山中有詩天下傳一生得閑兼得壽皓首龐眉世

稀有竹隱先生八十三定庵居士七十九客從遠方來
亦是六十叟手把一枝梅奉勸兩翁酒問公何以致遐
齡請翁細說吾細聽不燒丹不學仙五行有常數天所
稟賦焉人生一氣統四體衆人斲喪吾能全要知養生
無他術日多喫飯夜獨眠承翁見教謝翁去兩翁慙慙
留我住是夜醉眠苔竹軒夢見山靈向我言翁之所說
皆不然兩翁盛德合乎天天與遐齡五百年

觀陸士龍作顧彥先婦答夫二首有感韻

北風吹歲暮空閨獨棲止夙興淚盈掬夕息夢千里妾
生胡不辰失身從浪子嚼蘖苦我心餐米噤我齒離異
何足愁險澀可勝紀寄書西飛雁反覆話終始

鼠璞竊美名冠玉假外觀良人誇意氣下妾愁歲晏念
君使行邁雪嶺梅初粲春風桃已紅光陰等飛彈相思
果如何金環寬玉腕昔為連理枝今作搏沙散惜哉牛
與女脈脈阻河漢持棲良獨難守堅祗自讚雙劍幾時
合寄聲問華煥勿聽五羊歌富貴忘貧賤

栗齋鞏仲至以元結文集為韻

尋常被酒時歸到急投枕為愛次山文今夜醉忘寢偉
哉浯溪碑千載氣凜凜舂陵賊退篇少陵猶斂衽文章
自一家其意則古甚大羹遺五味純素薄文錦聱牙不
同俗斯文異所稟君君望堯舜人人欲倉廩古道不可
行時對窳樽飲

杜甫祠

嗚呼杜少陵醉臥春江漲文章萬丈光不隨枯骨葬平

生稷契心致君堯舜上時兮弗我與屹然抱微尚干戈
奔走蹤道路饑寒狀草中辨君臣筆端誅將相高吟比
興體力救風雅喪如史數十篇才氣一何壯到今五百
年知公尚無恙麒麟守高阡貂蟬入畫像一死不幾時
聲迹兩塵莽何如耒陽江頭三尺荒草墳名如日月光
天壤

阿竒晬日

窮居少生涯養子如種穀寸苗方在手想像秋禾熟吾

兒天所惠骨相頗豐碩娟娟懷抱中一歲至週日願汝
無災害長大庶可必十歲聰明開二十蚤奮發曾蟠三
萬卷手握五色筆策勲文字場致君以儒術不然學孫
吳縱橫萬人敵為國取中原闢地玄冥北他年汝成就
料我頭已白光華照老眼甘旨不可缺為子必純孝為
人必正直以我期望心一日必一祝勿為癡小兒茫然
無所識胎教尚有聞斯言豈無益

琵琶行

潯陽江頭秋月明黃蘆葉底秋風聲銀龍行酒送歸客
丈夫不為兒女情隔船琵琶自愁思何預江州司馬事
為渠感激作歌行一寫六百六十字白樂天白樂天平
生多為達者語到此胡為不釋然弗堪謫官一作官便歸
去廬山政接柴桑路不尋黃菊伴淵明忍泣青衫對商

婦

毗陵太平寺畫水呈王君保使君

畫龍篇
在後

何人筆端有許力捲來一片瀟湘碧摩挲老眼看不真

怪見層波湧虛壁天慶觀中雙魚龍物色雖殊妙處同
能將此水畜彼龍方知畫手有神通龍兮水兮終會遇
天下蒼生待霖雨

南嶽

南雲縹緲連蒼穹七十二峯朝祝融凌空棟宇赤帝宅
脩廊翼翼生寒風朝家遣使嚴祀典御香當殿開宸封
願四海扶九重干戈永息年屢豐五嶽惟今見南嶽北
望乾坤雙淚落

送來賓宰

君作來賓宰聽我說來賓蠻俗無王化當為行化人有
民無租賦租賦出商旅逐利遭重徵商旅亦良苦能放
一分寬可減十分怨不愛資囊橐但愛了支遣民窮賴
撫摩官貧俸不多但得百如安俸薄其奈何勿謂朝廷
遠官職易遷轉律已貴廉勤御事要明斷自縣辟為州
指日為太守須知早歸來瘴鄉不可久

出閩

千山萬山閩中路六尺枯藤兩芒屨去歲梅花迎我來
今歲梅花送我去梅花豈解管送迎白髮胡為又南征
天荒地老終無情歸去歸兮老石屏

玉華洞

憶昨游桂林岩洞甲天下竒竒怪怪生妙不可模寫玉
華東西岩具體而微者神功巧穿鑿石壁生孔罅玲瓏
透風月宜冬復宜夏中有補陀仙坐斷此瀟灑空山茅
葦區無地可稅駕舉目忽此逢心駭見希詫題詩媿不

能行人亦無暇

祝二嚴

僕本山野人漁樵共居處小年學父詩用心亦良苦搜
 索空虛腹綴緝艱辛語糊口走四方白頭無伴侶前年
 得嚴粲今年得嚴羽我自得二嚴牛鐸諧鍾呂粲也苦
 吟身束之以簪組遍叅百家體終乃師杜甫羽也天姿
 高不肖事科舉風雅與騷些歷歷在肺腑持論傷太高
 與世或齟齬長歌激古風自立一門戶二嚴我所敬二

嚴亦我與我老歸故山殘年能幾許平生五百篇無人
為之主零落天地間未必是塵土再拜祝二嚴為我收
拾取

市舶提舉

七十老翁頭雪白落在江湖賣詩冊平生知己管夷吾
得為萬壽堂前客嘲吟有罪遭天厄謀歸未辦資身策
雞林莫有買詩人明日煩公問蕃舶

懶不作書急口令寄朝士

老病懶作書行藏詩上見一心不相忘千里如對面我
已八十翁此身寧久絆諸君才傑出玉石自有辯隨才
供任使小大備衆選明君用良弼治道方一變與之致
太平朝廷還舊觀老夫眼尚明細把諸君看試將草草
書用寫區區願一願善調燮二願強加飯三願致太平
官職日九轉

鳳鳴有吉凶

鵲噪令人喜鴉噪令人憎人心自分別吉凶屬禽聲舜

時有鳳鳴文王時亦鳴漢時鳳亦鳴六朝時亦鳴鳳鳴
有吉凶人不仔細聽

婕妤詞

丹霞張誠子作此詞出以
示僕僕疑其太文因作此

紈扇六月時似妾君恩重避暑南薰殿清風隨扇動妾
時侍君王常得沾餘涼秋風颯庭樹團圓無用處妾亦
寵顧衰栖栖度朝暮扇為無情物用捨不知卹妾有深
宮怨無情不如扇

感寓四首

采薇人固高飲露蟬遂清謀茲一粒粟舉世共營營營
營亦多塗中有虧與盈陋巷一簞食朱門九鼎烹窮達
各有命繫誰主權衡吾生未可必秋風白髮生

蛛網幕虛簷一飽羅羣飛寒螿齧枯桑一身終繭絲物
物巧生理我生拙奚為貂裘日以弊石田歲長饑一貧
已到骨一氣儻未衰舉目送飛鴻悠悠知我誰

夜雨挾西風撼撼庭樹浮生堪幾秋青鬢忽已素鈿
刀剗九牛策蹇望長路所操斧無奇自好徒自誤改弦

調新聲履道易故步收功在桑榆其敢怨遲暮
紅紫委路塵綠樹有嘉色剗心晚聞道玩物若有得青
春坐銷歇方茲見真實人生到中年胡不保明德秋風
墮庭梧棲鳳去無迹矯首碧雲端一語三歎息

寄章泉先生趙昌父

靈鳳鳴朝陽神龍不泥蟠時兮不可為昌父乃在山思
君二十年見君良獨難時於邸報上屢見得祠官祠官
祿不多一貧其奈何采芝亦可食當作采芝歌近者李

侍郎直言遭逐去人皆笑其踈君獨有詩句君為山中
人世事安得聞入山恐未深更入幾重雲

時悅齋李侍郎去國章泉

詩送
其行

頻酌淮河水

有客游濠梁頻酌淮河水東南水多鹹不如此水美春
風吹綠波鬱鬱中原氣莫向北岸汲中有英雄淚

元宵雨

窮人不謀歡元夜如常時晴雨均寂寞早與一睡期朱

門粲燈火歌舞臨酒池酒闌歡不足九街恣游嬉前呵
驚市人簫鼓逐後隨片雲頭上黑翻得失意歸

小孤山阻風因成小詩適舟中有浦城人寫寄真

西山

羣山勢如奔欲渡長江去孤峯拔地起毅然能遏住屹
立大江干仍能障狂瀾人不知此山有功天地間

松江舟中四首荷葉浦時有不測末句故及之

夜聽楓橋鐘曉汲松江水客行信忽忽少住亦可喜且

食鰕魚肥莫問鱸魚美

行一作有

垂虹五百步太湖三萬頃除却岳陽樓天下無此景范
蠡挾西施功名付煙艇

秋風吹客衣歸興浩難寫寒林噪晚鴉紅日墮平野篙
師解人意棹酒旗下

扁舟乃官差舟子吾與汝汝為我作勞吾亦不汝負好
向上塘行莫過荷葉浦

趙尊道郎中出示堂畫四老飲圖滕賢良有詩亦

使野人著句

采芝商山秦四皓象戲橘中為四老我疑此畫即其人
有時以酒陶天真丹青不知誰好手作此飲態妙入神
摩挲半世江湖眼古錦軸中舒復卷細將物色辨人物
迺是晉時劉畢與陶阮一琴無弦橫膝上一琴團圓明
月樣一人持杓坐甕邊一人手攜文一編是中必寫酒
德篇諸君傷時強自遣麴生風味况不淺重氛妖氣蔽
神州誓江不救中原亂新亭舉目愁山河萬事何如一

樽滿一杯一杯醉復醉天地陶陶盡和氣道術相忘禮
法踈形骸懶散無機事此畫流傳知幾載生綃剝落精
神在何人為我更作杜陵飲中八仙歌將與冰壺主人
為此對

伏龍山民宋正甫湖山清隱廼唐詩人陳陶故圃

曾景建作記俾僕賦詩

故人昔住金華峰面帶雙溪秋水容故人今住伏龍山
陳陶故圃茆三間千載清風徐孺子門前共此一湖水

百花洲上萬垂楊，白鷗羣裏歌滄浪。故人心事孺子高，
故人詩句今陳陶。短衣飯牛不逢堯，何如繡鞍上著錦。
宮袍瓦盆對客酌，松醪何如紫霞觴。泛碧葡萄豆，真然
火度寒宵。何如玉堂夜照金蓮膏，吟成秃筆寫芭蕉。何
如沉香亭北醉揮毫，再三問君君不對。目送飛鴻楚天
外，細讀山中招隱篇。超然意與煙霞會，照影湖邊雙鬢
皓。此計知之悔不早，三椽可辦願卜隣。荷鋤相隨種瑤
草。

會稽山中

曉風吹斷花梢雨，青山白雲無唾處。
嵐光滴翠濕人衣，踏碎瓊瑤溪上步。
人家遠近屋參差，半成圖畫半成詩。
若使山中無杜宇，登山臨水定忘歸。

高九萬見示落星長句賦此答之

天星墮地化為石，老佛占作青蓮宮。
東來海若獻秋水，環以碧波千萬重。
雲根直下數百丈，一作尺時吐光燄驚

魚龍鳳凰羣飛擁，其後對面廬阜之諸峰。
陰晴風雨多

態度日日舉目看不同高髯能詩亦能畫自說此景難
形容且好收拾藏胸中養成筆力可扛鼎然後一發妙
奪造化功一作工高髯高髯須貌取萬物升沉元有數吾
聞此石三千年復化為星上天去

題申季山所藏李伯時畫村田樂圖

春秧夏苗秋遂獲官賦私逋都了却雞豚社酒賽豐年
醉唱村歌舞村樂鼓笛有聲無曲譜布衫顛倒傴僂舞
欲識太平真氣象試看一作觀此畫有佳趣管弦聲按宮

商發細轉柳腰花十八羅幃繡幙拂香

一作春

風九醞葡

萄金盞滑王孫公子巧歡娛勿將富貴笑田夫非渠耕
稼飽君腹問有黃金可樂無

嘉定甲戌孟秋二十有七起居舍人兼直學士院

真德秀上殿直前奏邊事不顧忌諱一疏萬言

援引古今鋪陳方畧忠誼感激辭章浩瀚誠有

補於國家天台戴復古獲見此疏伏讀再三竊

有所感敬效白樂天體以紀其事錄于野史

禁城雞唱金門開起居舍人攜疏來榻前一奏一萬字
歷歷寫出忠義懷頓首惶恐臣昧死越錄敢言天下事
百年河洛變幽朔恨滿東南天一角夷甫諸人責未酬
志士愁眠劔鋒落天意未回事難舉鄉來一試成千誤
狂寇頻歲自相屠盛衰大抵由天數昨臣銜命出疆時
自期有去必無歸屈節穹廬當憤死天相孤忠半道回
金山之下長江水擊楫中流書壯志東風吹上妙高臺
畧望江淮見形勢形勢從來祇如此幾年待得天時至

朝廷為計保萬全往往忘却前朝恥臣今未暇論規恢
讐敵已亡何慮哉中原曠地無人管政恐英雄生草萊
北方苦饑民骨立萬一東來竊吾粟邊頭諸州無鐵壁
借問誰能備倉卒請朝廷厲精兵擇良將辦多多策上
上更選人材老練通達分守要衝講明方略一賢可作
萬里城一人可當百萬兵坐令國勢九鼎重所賴君心
一點明長牋奏徹龍顏悅繼言臣愚進此說言雖甚鄙
用甚切宸斷必行天下福勿謂儒生論迂闊臣之肝膽

與人別讀書豈為文章設
王師若出定中原
玉堂敢草平邊策

盧申之正字得春郊牧養圖二本有樓攻媿先生題詩且徵予作

竹弓鳴雁鴨驚飛來別浦無人境
春風不搖楊柳影長頸紛紛占作家
半游波面半眠沙或行或立或如舞
或隻或雙或羣聚飲啄浮沉多態度
物情閒暇世忘機
分明一片太古一作平時巧偽不作民熙熙

我之居元在野平生慣識牛羊者今見蒲江出此圖半
日不知渠是畫一捷當前轉頭立一捷度浦毛猶濕中
有一蒼騎以牧牯犂相隨數十足殿後兩枚黃犛觶分
明如活下前坡路轉山南春草多耳根只欠牧兒歌

鄂州南樓

鄂州州前山頂頭上有縹緲百尺樓大開窓戶納宇宙
高插欄干侵斗牛我疑脚踏蒼龍背下瞰八方

一作無
荒

內外江渚鱗差十萬家淮楚荆湖一都會西風吹盡庾

公塵秋影涵空動碧雲欲識古今興廢事細看文簡李
公文

題曾無疑飛龍飲秣圖

雲巢示我良馬圖一騎飲水一騎芻竹批雙耳目搖電
毛色純一骨相殊何人貌此真權竒筆端疑有渥洼池
駑駘當用驥騮老羸得畫圖人看好盆中飲槽中秣無
用霜蹄空立鐵何如渴飲長城濠上波饑則飽喫天山
禾振首長鳴載猛士龍山踏碎搜狼窠

儒衣陳其姓工於畫牛馬魚一日持六簇為贈以

換詩

生絹六幅淡墨圖伊人筆端有造化驂騮汗血捉電光
牯犍倦耕眠草下陂塘漠漠煙雨後出水羣魚戲瀟灑
細看物物有生意不比尋常能畫者請君就此三景中
揮毫添我作漁翁岸頭孤石持竿坐白鷺同居蒲葦叢
有時尋詩出游衍款段徐行山路遠奚奴逐後背錦囊
木杪斜陽鴉噪晚有時蓑笠過田間農婦農夫相往還

手放鉏犁吹短笛日暮青郊黃犢閒王孫貴人不識此
此是吾儂佳絕處挂君圖畫讀吾詩令人懶踏長安路
黃州棲霞樓即景呈謝深道國正

朝來欄檻倚晴空暮來煙雨迷飛鴻白衣蒼狗易改變
淡粧濃抹難形容蘆洲渺渺去無極數點斷山橫遠碧
樊山諸峰立一壁非煙非霧籠秋色須臾黑雲如潑墨
欲雨不雨不可得須臾雲開見落日忽展一機雲錦出
一態未了一態生愈變愈奇人莫測使君把酒索我詩

索詩不可呼畫師要知作詩如作畫人力豈能窮造化
寄報恩寺長老恭率翁

報恩千楹歸一炬佛也不能逃劫數寶坊化作瓦礫場
堪笑月庭來又去率翁修造鳳樓手第一能將無作有
神工作舍鬼築牆鞭笞水石能飛走風斤月斧日紛然
行看華屋突兀在眼前好留一室館狂客早晚來叅文
字禪

織婦歎

春蠶成絲復成絹
養得夏蠶重剝繭
絹未脫軸擬輸官
絲未落車圖贖典
一春一夏為蠶忙
織婦布衣仍布裳
有布得著猶自可
今年無麻愁殺我

刈麥行

腰鎌上壠刈黃雲
東家西家麥滿門
前村寡婦拾滯穗
饘粥有餘炊餅餌
我聞淮南麥最多
麥田今歲屯干戈
飽飯不知征戰苦
生長此方真樂土

鄂渚張唐卿周嘉仲送別

武昌江頭人送別楊柳秋來不堪折漢陽門外望南樓
昨日不知今日愁英雄握手新相識人情正好成南北
酒闌人散最關情一雁西飛楚天碧

詰燕

去年汝來巢我屋梁間汙泥高一尺啄腥拋穢不汝厭
生長羣雛我護惜家貧惠愛不及人自謂於汝獨有力
不望汝如靈蛇銜寶珠雀獻金環來報德春風期汝一
相顧對語茅簷慰岑寂如何今年來於我絕蹤跡一貪

簾幕畫堂間便視吾廬為棄物

寄趙鼎臣

學如劉子政不使校書天祿閣
文如李太白不使待詔
金鑾殿倚樓終日看廬山
贏得虛名聞九縣才忌太高
心忌太清平平穩穩為公為卿
騏驎可羈乃歸帝閑麟
鳳莫馴為瑞人間人為瑞
徒能好騏驎可羈終遠到
歲寒心事幾人知手把梅花
供一笑

毗陵天慶觀畫龍自題
姑蘇羽士李懷仁醉筆詩

呈王君保寺丞使君

姑蘇道士天酒星醉筆寫出雙龍形墨蹟從橫奪造化
蜿蜒滿壁令人驚一龍翻身出雲表口吞八極滄溟小
手弄寶珠珠欲飛握入掌中拳五爪一龍排山山為開
頭角與石爭崔嵬波濤怒起接雲氣不向九霄行雨來
萬物枯焦天作旱兩雄壁隱寧非懶真龍不用只畫圖
猛拍闌干寄三歎

秋懷

紅葉無人掃黃花獨自妍聽談天下事愁到酒樽前水
閣終非海樓高不到天昔人已懷古况復後千年

到酒一作

酒對

元日二首呈永豐劉叔治知縣

焚香拜元日受歲客他州白髮難遮老新年諱說愁無
人能訪戴有地足依劉桃李爭春事梅花笑未休
市近人聲雜窓明雨色開異鄉輕度節同邸重傳杯不
礙狂夫醉知無賀客來故園歸未得茆屋想蒼苔

宿農家

門巷規模古田園氣味長
小桃紅破萼大麥綠銜芒
稚犬迎來客歸牛帶夕陽
儒衣愧飄泊相就說農桑

水陸寺

長沙沙上寺突兀古樓臺
四面水光合一邊山影來
靜分僧榻坐晚趁釣船回
明日重相約前村訪早梅

清明感傷

一笠戴春雨愁來不可遮
清明思上塚昨夜夢還家
歸

興隨流水傷心對落花
晉原松下淚沾洒楚天涯

都中書懷二首

醉臥長安市思歸東海涯
瓶餘殘臘酒梅老隔

一作兩

年

花日與愁為地時憑夢到家鄉
書三兩紙一讀一咨嗟
雪化晴簷雨爐烘凍壁春窮猶戀詩
酒懶不正衣巾寂
寞安吾分奔馳失我真枯桐
就煨燼容有賞音人

歲暮呈真翰林

歲事朝朝迫家書字字愁
頻沽深巷酒獨倚異鄉樓
詩

骨梅花瘦歸心江水流狂謀渺無際忍看大刀頭

山中即目

一作事

二首

岩路穿黃落人家隱翠微籠雞為鴨抱網犬逐鶉飛竹
好堪延客溪清欲浣衣禪扉在何許僧笠戴雲歸

茅屋七五聚沙汀八九磐梯山畦麥秀囊石障溪湍

一作

端

父老雞豚社兒童梨棗盤幽居有餘樂奔走愧儒冠

題徐京伯通判北征詩卷

一襟忠誼氣數首北征詩不許公卿見徒為篋笥竒街

枚衝雪夜擊楫誓江時此志無人共愁吟兩鬢絲

江上

山東江流急雲兼霧氣深輕鷗閒態度孤雁苦聲音客
路行無極風光古又今梅花出籬落幽事頗關心

賢女祠

南康縣外二十里有女祠昔有劉氏女少而慧父母初以許蔡無故絕蔡而以許吳

吳亡又以許蔡女曰女子身初許蔡奪以許吳二年矣今吳亡復以許蔡一女二許人尚何顏面登人之門投身于潭而死

士有敗風節慚魂埋九京幽閨持大誼千載著嘉名父

不重然諾女能輕死生寒潭墮秋月心跡兩清明

次韻史景望雪夜

雪中寒力壯病骨瘦難勝溫酒撥爐火題詩敲硯冰驚
心雙白鬢知我一青燈欲悟浮生事思參大小乘

春日懷家

細數平生事何堪挂齒牙客遊免廢學身拙婦持家開
甕嘗春酒租山摘早茶關心此時節歸興滿天涯

寄沈莊可

無山可種菊強號菊山人結得諸公好吟成五字新紅
塵時在路白髮未離貧吾輩渾如此天公似不仁

山行

度嶺休騎馬臨淵看網魚木根高可坐岩石細堪書谷
鳥鳴相答山雲卷復舒儒衣人賣酒疑是馬相如

次韻謝敬之題南康縣劉清老園

劉子隱居地真如李愿盤萬松春不老多竹夏生寒卜
築世情遠登臨客慮寬題詩疥君壁聊以記遊觀

淮上春日

邊寒客衣薄漸喜暖風回社後未聞燕春深方見梅壯
懷頻撫劍孤憤強銜杯北望山河語一作路天時不再來

麻城道中

三杯成小醉行處總堪詩臨水知魚樂觀山愛馬遲林
塘飛翡翠籬落帶酴醿問訊一作信邊頭事溪翁總不知

望花山張老家

元從邊上住來此避兵興麥麩朝充食松明當夜燈蔽

門麻莽莽護壁石層層老嫗逢人哭吾兒在謝陵

一老嫗逢

人必大哭云我兒在謝陵不歸也光州有謝陵橋其子與賊戰死于此

春日

淫滯江湖久蹉跎歲月新客愁茅店雨詩思柳橋春秣馬尋歸路騎鯨問故人山林與朝市何處著吾身

聞李將軍

一作全

至建康

疋馬徑趨府將軍意氣多來依漢日月思復晉山河邊將慚尸素朝臣奏凱歌分明御狙詐得失竟如何

江漲見移居者

夏潦連秋漲人家水半門都拋破茅屋移住小山村
聒聒籠雞犬累累帶子孫安居華屋者應覺此身尊

送湘漕趙蹈中寺丞移憲江東

持節復持節因循霜鬢侵盛衰關大數豪傑負初心
宇宙虛長算江湖寄短吟番陽秋水闊湘浦未為深

立春後二首

久望春風至還經閏月遲梅花丈人行柳色少年時
愛

酒常無伴吟詩近得師離騷變風雅當效楚臣為
東風吹竹屋無數落梅花凍雀棲簷角饑鳥啄草芽家
鄉勞夜夢客路又春花莫訝狂夫醉西樓酒可賒

寄韓仲止

何以澗泉號取其清又清天游一丘壑孩視幾公卿杯
舉即時酒詩留後世名黃花秋意足東望憶淵明

題張僉判園林

園圃屋東西從君一杖藜雨寒花蕊瘦春重柳絲低亭

館常留客軒窓總傍溪
摩挲雪色壁安得好詩題

哭趙紫芝

嗚呼趙紫芝其命止於斯東晉時

一作朝

人物晚唐家數

詩瘦因吟思苦窮為宦情癡憶在藏春圃花邊細話時

嘗在平江孟侍郎

藏春圃終日論詩

江村何宏甫載酒過清江

玉筍千峰雨金風十日秋誰能多載酒來此共登樓
山立閱萬變溪深納衆流故人歸未得我亦為詩留

臨江軍新歲呈王幼學監簿

夢說去年事詩從昨夜吟
三杯新歲酒千里故鄉心
人共梅花老愁連江水深
家書忽在眼一紙值千金

訪楊伯子監丞自白沙問路而去

欲訪揚雄宅扁舟過白沙
自從山以後直到水之涯
風節古人物文章老作家
相尋有忙事第一問梅花
朝市風波地乾坤漁獵場
生民日憔悴吾道亦淒涼
龍不為霖出鳳於何處
歲暮羣鴉爭晚噪一意送斜陽

劉興伯黃希宋蘇希亮慧力寺避暑

何處避炎熱相期過寶坊萬松深處坐六月午時涼鐘
磬出深屋江山界短墻醉來歸興懶留宿贊公房

秋夜旅中

旅食思鄉味砧聲起客愁夜涼風動竹人靜月當樓浮
世百年夢他鄉幾度秋店翁新酒熟一醉更何求

舟行往弔故人

喬木風聲壯大江天影圓悲秋時把酒愛月夜行船未

及到河上先愁過竹邊倚蓬思往事聞笛為淒然
無策

老覺登樓懶心知涉世踈夢蕉還得鹿緣木可求魚晚
歲未聞道平生欠讀書行藏兩無策究竟果何如

題萍鄉何叔萬雲山

詩人姚仲同乃
胡仲友詩友

拄杖穿雲去一坡仍一坡地高山不峻花少竹還多家
近登臨使人賢氣味和能詩老姚合朝夕共吟哦

常寧縣訪許介之途中即景

竹徑入茅屋松坡連菜畦深瀦漚麻水斜豎采桑梯區

別鄰家鴨羣分各線雞行人來少憇假道過東溪

閣雞一綿

作一羣各線則別作一羣

建昌道中

此篇誤寫在高九萬集中

凜凜北風勁行行西路賒人情甘淡薄世事苦參差酒
易逢知己詩難過作家林間數點雪錯認是梅花

訪嚴坦叔

麻姑山下泊城郭帶煙霞攜刺投詩社移船一作賣錢傍酒

家沙禽時弄水，檉柳夏飛花。小酌未能了，西樓日又斜。
杜仲高自鄂渚下儀真。

鄂渚三千里，南樓看月回。東園花政好，去歲客重來。兄
弟皆名士，文章動上台。傾城傾國色，也用覓良媒。

見趙知道運使

飽食武昌魚，不如歸故廬。盟鷗還海道，問雁覓家書。又
把鄉人刺，來投使者車。東園桃李與李，莫使著花疎。

黃道士出爻

林屋何瀟灑，權為羽士家。客來多載酒，僧至自煎茶。試
墨題新竹，攜筇數落花。飲中忙過日，無暇問丹砂。

陳伯可山亭

梯險登霞外，乘流過竹西。寒溪隨雨漲，高閣與雲齊。雙
鶴有時舞，孤猿何處啼。清吟無盡興，白石可留題。

舟中病起登覽

檣棹病三日，登樓舉一觥。江山從古在，花草逐時生。南
浦佳人別，西風送客行。錦鱗能自躍，獻我一杯羹。

見湖南綉使陳益甫大著

敢寫散人號來登君子堂論文才力短憂世話頭長老
不堪行路心思歸故鄉數行詩後話夜夜吐光芒

為作詩跋

甚佳

南臺寺長老乃福州士人陳其姓語及先拙庵遭
際寺乃石頭和尚道場

元龍湖海士叅得石頭禪卓筆翻千偈住山今十年安
心一丘壑過眼幾雲烟莫笑拙庵拙聲名動九天

真西山帥長沙禱雨

出郭問農事家家笑語聲有田皆足水既雨亦宜晴山
下溪流急街頭米價平明朝聞一作領客相見賀秋成

蘇希亮約客遊劉伯興大自在亭

偶爾來江上從君到酒邊雨晴花弄日風定柳凝烟適
意共一笑浮生無百年明朝大自在誰辦載花船

客中寄家書併簡季道姪

東隱三年別西風一紙書逢人相問訊念我獨勤劬游

子思吾土先人有弊廬欲歸歸未得妻子定何如

舟中夜坐

獨坐觀星斗一襟秋思長天河司米價太乙照時康月

浦孤帆過風荷一路香持杯問舟子今夜宿誰鄉

俗識
以天

河顯晦卜米
價之貴賤

淮東趙漕領

冥一作

客東園趙世卿賸談近日諸公

僕謂今日東園之會想像歐蘇風流不可見

今日東園會能為野客期乾坤一南北花木幾興衰亭

館經行地歐蘇無恙時風流不可見烟雨謾題詩

沈莊可號菊花山人即用其言

老貌非前日清吟似舊時已無藏酒婦幸有讀書兒連
歲修茆屋三秋繞菊籬寒儒有奇遇太守為刊詩

太湖縣雪中簡段子克知縣

臘雪隨風下蹇驢行路難匆匆投邸舍草草共

一作杯宴具

盤喜見豐年瑞渾忘昨夜寒兒童不解事却作柳花看

許介之約過清溪道上有成

行盡白雲際乘槎過水西
稻田秋後雀茅舍午時雞
野飯自不惡村醪亦可攜
聞鐘欲投宿何處是招提

送張子孟

郴陽有鬼哭山
桂陽有神愁嶺

君為郴桂客聽說道途難
不過神愁嶺須經鬼哭山
心平無險路酒賤有歡顏
早作還鄉計高堂鶴髮斑

南豐縣南臺包敏道趙伯成同遊

笑傲南臺上東風吹鬢絲
眼明花在處春好雨晴時
樓閣多臨水溪山可賦詩
留連無盡意故遣酒行遲

長沙道上

詩情滿天地客夢繞瀟湘何處桂花發秋風昨夜香
登山猶矍鑠照水見昂藏未了一生事難禁兩鬢霜

萍鄉客舍

草罷惜春賦持杯亦鮮歡簷楹雙燕語風雨百花殘
小閣無聊坐征衣不耐寒地爐燒石炭強把故書看
譚俊明雪中見訪從而乞米

今日病方起君來喜可知地爐燒榾柮瓦釜煮犁祈門

外雪三尺窓前梅數枝野夫饑欲死誰與辦晨炊

訪陳與機縣尉於湘潭下攝市

清淡守風節當官若隱居自稱為漫尉人道是迂儒俸
外無炊米公餘但讀書王門多貴戚道眼視如無

買得南坡景創成西尉司宅幽連

一作

寺觀地廣帶亭

池能事事易了役民民不知題詩記顛末政不假人碑

觀靜江山水呈陳魯叟漕使

桂林佳絕處人道勝匡廬山好石骨露洞多岩腹虛崢

嶒勢相敵溫厚氣無餘可惜登臨地春風草木踈
昨者登梅嶺茲來入桂林相從萬里外不負一生心湖
上千峰立樽前十客吟譏評到泉石吾敢望知音

昭武劉圻甫以嶒篁隱居圖求詩

相對兩山碧春風搖綠篁一巢雲建造三澗水宮商谷
口躬耕稼盤中歌壽昌桃花認行路他日訪劉郎

題趙庶可山臺

層臺高幾許此即會稽圖一目空秦望千峰壓鏡湖雲

煙分境界城郭限廉隅他日傳佳話蘭亭與此俱
天造此一景超然闌闌間坐分臺上石看盡越中山松
月照今古樵風送往還只愁軒冕出閒却白雲關

贈張季冶

秋扇交情薄儒衣行路難縱懷千里志也要一枝安夢
繞梅花帳愁生首宿盤從來食肉相千萬強加餐

姪淑遠遊不得書

客夢江湖遠窮居骨肉離尺書無寄處中夜不眠時念

爾衣裘薄滿懷風露悲狂遊斷消息深負竹林期

寄梅屋趙季防縣尉

疇昔交遊密睽違歲月多石屏今老矣梅屋病如何世
路生荆棘家山足薜蘿共尋深處隱此計莫蹉跎

歸來二首兒子創小樓以安老者

老去知無用歸來得自如幾年眠客舍今日愛吾廬處
世無長策閑時讀故書但能營一飽渾莫問其餘

破屋不可住如何著老身喜於喬木下見此小樓新山

好如佳客吾歸作主人
摩挲雙腳底無復踏紅塵

歸後遣書問訊李敦文

華字實夫

憶作南州客歸來東海濱
尚懷憂世志忍說在家貧
老作山林計夢隨車馬塵
鬱孤臺上月無復照詩人

後夜鬱孤

臺上月更從何處照
詩人數文送行詩也

醉眠夢中得夏閏得秋早
雨多宜歲豐一聯起來

西風悲人且聞邊事

夏閏得秋早雨多宜歲豐
今朝上東閣昨夜已西風
田

野一飽外乾坤萬感中傳聞招戰士人尚說和戎

一笑

海曲荒涼地吟邊蹭蹬身時危法當隱年老慣居貧俗
客苦戀坐小孫癡弄人等閒成一笑不覺把杯頻

送姪孫汝白往東嘉問訊陳叔方諸丈

子去尋名勝何慚著布衣出門知所鄉在旅亦如歸道
誼無窮達文章有是非寄聲陳與趙相賞莫相違

寄南昌故人黃存之宋謙甫二首

謙甫多才思存之重誼襟一書愁話別千里夢相尋南
浦扁舟上東湖萬柳陰舊時行樂處何事不關心
久客歸來後家如舊日貧青山何處隱白髮也愁人畎
畝一生事乾坤百病身時無嵇呂駕相憶莫相親

送趙安仁之官上虞二首

表表魁吾相面如田字方早宜朝玉陛猶自綰銅章上
挹葉丞相近瞻商侍郎風流接前輩偃室有輝光
遠庵家學在持此去為官冰雪吾身白風霜吏膽寒一

心毋妄用百姓自相安賢者妙為政誰言宰劇難

秋日

秋風梧葉雨袞袞送秋涼一氣四時轉幾人雙鬢蒼
游如說夢久客乍還鄉欲作安居計生涯尚渺茫

君玉同訪豈潛飲間君度曼卿不約而至鶴方換
翎羽出舞於桂花之下不可無語

秋來常日雨雨霽忽秋深鶴換一身雪花開滿樹金三
杯動情性一笑付園林莫怪先歸去衰翁薄

一作被疾侵

戊戌冬

造化人難測，寒時暖似春。
蛟龍冬不蟄，雷電夜驚人。
四海瘡痍甚，三邊戰伐頻。
靜中觀氣數，愁殺草茅臣。

題姪孫豈潛家平遠圖

好山橫遠碧，平野帶林塘。
四望耕桑地，幾年雲水鄉。
海天龍上下，秋日鶴翱翔。
覩物忽有感，無心住草堂。

夏日續題

海近朝曦赫，山明宿霧消。
紫雲縈碧落，白鷺點青苗。
避暑

暑軒亭爽凭虛眼界遙時來一登眺初不待招邀

因風再寄南昌故人兼簡王帥子文

寄聲黃與宋書去望書還別後交情在年來世路艱吾
思蹈東海君合隱西山詩卷勤收拾留名天地間
江湖歸亦好朋友恨相踈倏作三年別纔通一紙書詩
盟誰是主世道正愁予若見王都督煩君問起居

舟中

檣棹河梁畔推蓬得句新雲為山態度水借月精神密

樹巖飛翮平波見躍鱗饑年村落底也有醉歸人

送曉山夏官甫入京

歲月頻看鏡功名一據鞍勿言行路惡有志戀家難芳
草客程遠落花春夜寒江湖舊時夢相逐到長安

辛丑歲暮三首

日月易流轉一年仍一年身從憂患老事逐歲時遷白
首未聞道清貧不愧天寒林松柏瘦花柳又春妍

臘盡無多日吾生有幾年老於人事懶貧覺世情偏獨

枕江湖夢閉門風雪天三杯動詩興得句落梅邊
意氣久凋落形模老可憎能扶雙病脚賴有一枯藤世
味淡如水吾心達似僧明朝今日事一任運騰騰

歲旦族黨會拜

衣冠拜元日樽俎對芳辰上下二百位尊卑五世人排
門喬木古照水早梅春寒事將消歇風光又一新

姪孫子淵新居落成

一區揚子宅中有讀書堂早覺儒風好兼看野趣長藩

籬帶花竹里巷接農桑安得茆三架為鄰住汝傷

子淵送牡丹

有酒何孤我因花賦惱公可憐秋鬢白羞見牡丹紅
海上盟鷗客人間失馬翁不知衰病後禁得幾春風

晚春

春來涉

一作能

幾日又到落花時老面羞看鏡愁懷強作

詩雨墻蝸篆古風樹鳥巢危有客時相過樽前一局碁

嘉熙己亥大旱庚子夏麥熟

餓喙偏生事空言不療饑誰知歲豐歉實係國安危世
變到極處人心無藉時客來談盜賊相對各愁眉

瀕海數十

一作千

里饑民及

一作幾

萬家雨多憂壞麥春好

忍看花鑿淺疏田水占晴視晚霞老農如鬼瘦不住作
生涯

庚子薦饑

連歲遭饑饉民間氣索然十家九不爨

一作飽

升米百餘

錢凜凜饑寒地蕭蕭風雪天人無告急處閉戶抱愁眠

餓走拋家舍從橫死路岐有天不雨粟無地可埋屍劫
數慘如此吾曹忍見之官司行賑卹不過是文移

去歲未為歉今年始是凶穀高三倍價人到十分窮險

浙矛頭菜

一作米

愁聞飯後鐘新來慰心處隴麥早芄芄

花朝姪孫子固家小集見其後園一池甚廣因思

唐戴簡隱居長沙東池柳子厚有記吾子固雖

富而不驕有禮文足以飾身鄉里稱其善馬少

游之流也余以東池隱居稱之不為過况此乃

吾家故事特欠柳柳州作記爾

今朝當社日明日是花朝佳節唯宜飲東池適見招綠
深楊柳重紅透海棠嬌自笑鬢邊雪多年不肖消

代書寄韓履善右司趙庶可寺簿

懶不脩書札將詩問起居升沉元自異故舊忍相踈學
術有餘用班行不次除功名付公等世道莫愁予
涉世幾三折行年近八旬江湖倦遊客天地苦吟身白
髮可憐老青雲多故人東風雖有力朽木不逢春

閉戶生涯薄憂時念慮長老猶思汗漫貧已在一作膏
膏弱柳饒春色幽蘭抱國香窮通安我命一笑且持觴
月夜懷董叔宏聞其入京未得報

酒醒興未已詩成吟不休一涼風滿座半夜月明樓老
驢思千里飛鴻閱九州故人何處在誰作置書郵

雁山羅漢寺省王總幹之墓待和甫主簿之來

山鳥怪儒衣遊山我亦癡叫雲雲不應問水水相知俗
物刺人眼春風發我詩噪簷鴉鵲喜主簿有來期一作時

雁山總題此山本朝方顯

此地古無聞誰封萬石君山林纔整整來往早紛紛兩
派龍湫水千峰雁蕩雲東西十八寺紀載欠碑文

幾山兼幾水更有幾煙霞不立僊人宅都為釋氏家賓
秋多少雁報曉一雙鴉有此山林勝如何在海涯

會心

我本江湖客來觀雁蕩竒脚穿靈運履

一作履

口誦貫休

詩景物與心會山靈莫我知白雲迷去路臨水坐多時

淨明

林巒相掩映，巖谷獨玲瓏。
下置維摩室，上通龍伯宮。
靈珠四時雨，秋水一簾風。
甚欲觀新月，山高脚力窮。

新月
谷在

上高不
可登

謝項子宜帥幹遣饋

聞說沙溪上，分明似渭川。
重山照一作華屋，萬竹繞清

蓋

泉。遣饋知相憶，登門未有緣。
一樓先月景，想像在吟邊。

姪孫曷以東，埜農歌一編。
來細讀，足以起予七言。

有汲水灌花私雨露臨池疊石幻溪山草欺蘭
瘦能香否杏笑梅殘奈俗何似此兩聯皆自出
新意自可傳世然言語之工又未足多其體格
純正氣象和平為可喜余非諛言自有識者因
題其卷末以歸之

吾宗有東塾詩律頗留心不學晚唐體曾聞大雅音霜
空孤鶴唳雲洞老龍吟羣噪無才思昏鴉自滿林

風雨無慘中覽鏡有感作小詩未有斷句適兩姪

孫攜詩卷來

覽鏡忽有感誰能寫我真
峻增忍饑面蹭蹬苦吟身
風葉飄零夜雨花狼籍
春相過慰牢落吾族有詩人

姪孫槃字子淵服字宣潛各攜詩卷來相與在酒邊
細細讀之足以起予醉石眠花影吟廊步蘚紋春水
綠平野夕陽紅半山一樽溪上別孤棹雨中行此槃
之作也一燈深夜雨幾處不眠人一草亦關春造化
衆星能表月精神此服之作也如此等語不可枚數

摘其一二以識之當自有識者為其賞音

歲暮

一作旦

書懷寄林玉溪

吾年幾八十暮景不勝斜老鶴猶能語枯梅強作花一
心為死計無意問生涯有酒時相過東鄰八九家

笑共梅花語窮難與命爭人皆居燠館我獨墮寒坑假
合非吾道幽棲了此生門墻元自靜羣小莫從橫

衮衮日不暇看看歲又徂一生賦茅屋幾度換桃符天
宥容吾老人皆笑我迂玉溪何所見時復問詩癯

壬寅除夜

今夕知何夕滿堂燈燭光杜陵分歲了賈島祭詩忙橫
笛梅花老傳杯柏葉香明朝賀元日政恐雨相妨

癸卯歲旦

淳祐第三載正朝把一杯老夫真是病賀客不須來擇
日修茅屋當春覓柳栽新年莫多事且放好懷開

新年多雨一日晴色可喜

一晴良可喜始覺好新年綠漲春前水青開雨後天看

花我老矣把酒興悠然病脚妨行樂三杯歸醉眠

送王仲夔制機宰瀏陽

一身供世用六月赴官忙當此炎天熱知君心地涼吏
能師卓魯縣界接瀟湘試飲瀏陽水清清滋味長

瀏陽誰謂小桑柘萬家春遠宦逢知己推心在惠民速
宜還縣債聞早綴朝紳說與諸公道方巖後有人

送黎明府

縣債三年了鄉心萬里飛一身如許瘦百姓不妨肥買

宅憑誰辨抱琴何處歸諸公競推轂穩去著朝衣

訪西澗

一作山

王深道

諸王居處僻古屋滿山坡傳到宋淳祐來從晉永和詩
書歷年久名勝結交多一澗流芳潤滔滔秋水波

諸老傷凋謝淒涼屬此時相從一夜語忍讀四哀詩世
事生愁緒秋風吹鬢絲黃花香晚節說與秀岩知

吳荆溪四

哀詩語
亦作話

挽溫嶺丁竹坡

瀟洒復瀟洒是為丁竹坡生涯渾草草詩句自多多恨
不識是叟悲哉作此歌數篇遺稿在不算葬烟蘿

廣東漕李實夫四首

乾坤雖廣大人物不能多議論還諸老文章自一科從
橫負才畧緩急任干戈不有濟時傑其如世事何

志士規模遠非時展布難莫言南地暖須念北風寒楮
賤傷財力兵驕稔禍端盛衰關氣數天下幾時安

千里長城手如何在廣州共談天下事莫上斗南樓瘦

一作
硬

露封侯骨忠懷報國愁
丁寧北來雁邊信怕沉浮
忘家甘旅食憂國屬愁顏
有客佩金印何人守玉關
風霜晚秋後天地夕陽間
痛灑傷時淚別公歸故山

求安

愁來須強遣老去只求安
酒熟思招客詩成勝得官
梅花天下白雪片夜深寒
衲被蒙頭睡儵然百慮寬

秋日早行

雁叫秋容老鳥飛曙色分
晨炊何草草宿酒尚醺醺
野

曠連滄海山長帶白雲馬行沙上路驚起白鷗羣

石洲遇陳季申話舊

綠樹挂烏帽清波照白頭合隨秋燕去那作賈胡留紅
吐檳榔唾香薰茉莉毬樽前話疇昔一笑不能休

書事

喜作羊城客忘為鶴髮翁問天求酒量翻海洗詩窮已
過西南道適遭東北風扁舟載明月枉作賣油公

西南道乃

廣州一稅場○前李約作漕時請遊藥湖出新寵佐尊
一意顧盼無暇與賓客語僕有詩云手拍錦囊空得句

眼看檀板過知音
漕大怒謂舟
中有麻油不投稅
拘留其船

故人陳秘書家有感

晚春風雨後
花絮落無聲
綠泛新荷出
青鋪細草生
私蛙為誰噪
老犬伴人行
舊日狂賓客
樽前笑不成

林塘劫火後
更作兩家分
笋折頭搶地
松高氣拂雲
老夫來訪舊
稚子解談文
自是麒麟種
那隨雁鶩羣

臨江小泊

艤舟楊柳下
一笑上茶樓
適與胡僧遇
非因越女留
雲

行山自在沙合水分流獨酌臨清泚知心是白鷗

謝蕭和伯見訪

定交雖日淺老眼見君深急誼真如渴能詩不肖吟江
湖尊白髮土苴視黃金野客無邊幅相看話此心

廬陵城外


郭外人煙好行行過北阡迎船分社肉汲井種春田綠
樹前村路黃梅細雨天客遊鄉土別景物只同然

一作前

別董叔宏兄弟

年老思家切交深話別難扁舟行且止尊酒強相寬客
路歸來晚人情去後看西風吹過雁千萬寄平安

宋詩鈔卷九十五



總校官庶吉士臣張能照

校對官助教臣金學詩

謄錄監生臣徐士俊